

مُنِيَّةُ الْمُصَلِّي

MUNYATUL MUSOLLI (Cita-Cita Orang Yang Bersembahyang)

13 PELBAGAI KEBAJIKAN DARIPADA SEMBAHYANG DAN ZIKIRNYA

[Dan sayugianya], bagi orang yang sembahyang itu mengetahui akan yang ia hendak perbuat itu dan qadarnya supaya syukurlah ia akan Allah ﷻ atas barang yang diberi taufiq akan dia. Maka bahawasanya, sembahyang itu sanya telah menghimpunkan padanya beberapa bagai daripada segala kebajikan; daripada **af'al** (أفعال - perbuatan) dan **azkar** (أذكار - zikir).

Maka apabila berdiri hamba kepada sembahyang, maka berkata ia: “Allahu Akbar”, maka hendaklah ia muqaranah niatnya yang dimuktabar pada syara’, serta diketahui pula akan kebesaran Tuhannya yang ia berdiri khidmat kepadaNya. Maka maknanya “Allahu Akbar” itu terlebih **A’zom** (أعظم - besar) dan **Ajal** (أجل - mulia). Maka hendaklah benar hatinya. Demikian pula firman Allah ﷻ:

“Telah mengetahui hambaKu bahawa Aku yang terlebih besar daripada tiap-tiap suatu. Dan sanya ia telah berhadap atasKu.”

Maka apabila mengangkat dua tangannya kepada kedua telinganya mengisyaratkan ia melepaskan daripada tiap-tiap **ma’bud** (معبود - yang disembah) yang lain daripada Allah ﷻ.

Kemudian apabila membaca:

سُبْحَانَكَ اللَّهُمَّ

Yakni: **“Maha Suci Allah daripada tiap-tiap yang kejahatan dan kekurangan bahawasanya Ia yang mempunyai bagi segala puji.”**

وَتَبَارَكَ اسْمُكَ

Yakni: **“Maha Suci Ia dan berkat pada yang menyebutkan namaNya akan pekerjaan yang dikerjakan.”**

وَتَعَالَى جَدُّكَ

Yakni: **“Maha Tinggi qadar Engkau Tuhanku, dan Maha Besar Engkau.”**

لَا إِلَهَ غَيْرُكَ

Yakni: “Tiada yang menjadikan, dan yang memberi rezeki, dan yang disembah yang lain daripada Engkau, tiada yang dahulu dan yang kemudian.”

Maka apabila membaca:

أَعُوذُ بِاللَّهِ مِنَ الشَّيْطَانِ الرَّجِيمِ

Yakni: “Aku pohonkan Dikau bahawa Engkau lindungi dan Engkau peliharakan daku daripada fitnah syaitan yang kena rejam, yakni kena kutuk.”

Dan apabila dibacanya:

بِسْمِ اللَّهِ الرَّحْمَنِ الرَّحِيمِ

Maka, maknanya: “Aku minta tolong dengan nama Engkau pada tiap-tiap sesuatu pekerjaanku. Ialah yang mempunyai lemah-lembut, lagi mempunyai kasih sayang atas segala makhluk, dengan memberi rezeki lagi kasih sayang akan segala hambaNya yang Mukminin.”

Dan apabila membaca Fatihah hingga akhirnya. Maknanya: “Segala puji bagi Allah Tuhan yang tiada menjadikan daku daripada orang yang dimurkakan dan orang yang dustakan, iaitu Yahudi dan Nasrani, tetapi jadikan daku di atas jalan Anbiya’ dan Syuhada’ dan Shiddiqin.”

Maka apabila engkau ruku’, maka fikir di dalam diri engkau, maka seolah-olah engkau berkata: “Hai Tuhanku! Bahawasanya aku merendahkan diri aku antara hadapanMu dan aku datang dengan diriku yang ‘ashi (عاصي - derhaka) ini kepadaMu, dan mengikut diriku yang banyak jenayah bagi ‘Azomah (عظمه - keagungan) Engkau. Mudah-mudahan, Engkau ampunilah akan daku.”

Dan dibacanya:

سُبْحَانَ رَبِّيَ الْعَظِيمِ وَبِحَمْدِهِ

Maknanya: “Maha Suci Tuhanku, aku merendahkan diriku bagi Tuhan Yang ‘Azhim dan Maula (Tuan) yang Karim (Mulia).”

Kemudian engkau angkatkan kepalamu kepada i’tidal, dan mengucap:

سَمِعَ اللَّهُ لِمَنْ حَمِدَهُ

Maknanya: “Telah mengampuni Allah bagi orang yang mengatakan (mengesakan) Dia dan mengerjakan taat akan Dia.”

Kemudian mengucapkan:

رَبَّنَا لَكَ الْحَمْدُ

Maknanya: “Tuhan kami, bagiMu segala kepujian, kerana Engkau yang memberi taufiq akan kami bagi ini (sembahyang).

Kemudian maka engkau sujud. Maknanya, “Aku cenderungkan diriku dengan zalil (ذليل - kehinaan) dan menyerahkan diriku kepadaMu. Engkau yang mempunyai Karam (كرم - kemuliaan) dan ampun.”

Dan apabila engkau duduk antara dua sujud mengucap:

رَبِّ اغْفِرْ لِي وَارْحَمْنِي وَارْزُقْنِي وَاجْبُرْنِي وَعَافِنِي وَاعْفُ عَنِّي

Maknanya: “Ampunkan daku, hai Tuhanku! Akan kesalahanku dan kasihani olehMu akan hambaMu yang khotiah (خاطئة - banyak kesalahan), dan beri rezekikan olehMu akan daku, dan jabarkan dho’ifku, dan tunjuki akan daku akan jalan yang sebenarnya, dan ‘afiat akan daku, dan maafkan daripada aku.”

Maka apabila engkau duduk tasyahhud dan membaca tahiyyat, maka engkau baca:

التَّحِيَّاتُ الْمُبَارَكَاتُ الصَّلَوَاتُ الطَّيِّبَاتُ لِلَّهِ

Maknanya: “Kekal kerajaan selamanya itu bagi Allah yang mempunyai sembahyang yang lima waktu. Tiada sayugianya (boleh) bahawa disembahyangkan, melainkanNya.”

السَّلَامُ عَلَيْكَ أَيُّهَا النَّبِيُّ وَرَحْمَةُ اللَّهِ وَبَرَكَاتُهُ

“Sejahtera atasmu, ya Rasulullah, seperti engkau sampaikan suruhan Tuhan engkau, dan engkau nasihat bagi umat engkau, warahmatullah (ورحمة الله - dan rahmat Allah) dan ridhwan (رضوان - keredhaan Allah) bagimu, wajib dan berkat atasmu dan atas ahlimu, yakni bagi segala isi rumahmu.”

السَّلَامُ عَلَيْنَا وَعَلَى عِبَادِ اللَّهِ الصَّالِحِينَ

Yakni: “Ampun Allah atas kami dan atas segala orang yang dahulu, daripada Nabiyyin dan Shiddiqin dan orang yang berjalan akan jalan mereka itu hingga hari kiamat.”

أَشْهَدُ أَنْ لَا إِلَهَ إِلَّا اللَّهُ

Yakni: “Tiada ma’bud yang disembah dengan sebenar-benar dalam langit dan bumi yang lainnya ialah Tuhan yang Wahdaniyah (وحدانية - Esa pada zat, sifat dan af’al).”

وَأَشْهَدُ أَنَّ مُحَمَّدًا عَبْدُهُ وَرَسُولُهُ

Ialah, Khatamun (خاتم - kesudahan) Nabiyyin dan Mursalin, dan Sofiyyah (صفية - pilihan) Rabbil ‘Alamin, dan pilihan daripada segala makhluk.

Kemudian solawat atas Nabi ﷺ. Kemudian maka meminta doa bagi dirimu dan bagi segala Mukminin dan Mukminat.

Kemudian memberi salam pada pihak kananmu dan kirimu. Ertinya, hai segala saudaraku! Kamu sejahtera daripada kejahatanku dan khianatku apabila keluar aku daripada masjid.”